

秋蟬吟館詩鈔

聞之全椒薛先生曰亞匏振奇人也至性人也
晚無所遇而託於詩光緒初元乃與君相見于
蓋山君時已倦游少年抑塞磊落之氣殆盡而
同氣猶相求也造訪逆旅密坐傾衿予蓋習聞
金陵義士翻城之盟微叩之君蹙頰不欲盡其
辭清言談藝踰晷而別固未得讀其詩也獻竊
聞之詩有風有雅則有正有變廟堂之製雖容
揄揚箬後嗣者正雅尙已天人遷革三事憂危
變雅之作用等諫書流而爲春秋家者非無位
者之事若夫形四方之風長言永歌政和安樂

者有之既不獲作息承平之世兵刃死亡非徒聞見而已蓋身親之甚而式微之播遷免爰之傷敗清人之翱翔黍離之顛覆不自我先不自我後則夫悲歌慷慨至於窮蹙酸嘶有列國變風所未能盡者亞匏之詩云爾大凡君之淪陷之鮮民之乞食一日茹哀百年忍痛情動於中而形於言於我皆同病也風之變變之極者所謂不得已而作也君終焉放廢不復能以變雅當諫書春秋紀衰亦布衣者所竊取君蕉萃老死不再相見今從東季符令君得讀君詩散佚

而後佔數百篇跌蕩尙氣所謂振奇者在是纏
緜婉篤所謂至性者在是昔者羣盜窟穴金陵
者十二年賢人君子出於坎窞予所識如田君
鼎臣管君小異皆嘗雪涕嚼齒言當日情事如
君之詩至若張義士炳垣尤曠代之奇烈獻追
哀以詩差於君詩爲笙磬矣今者南國江山重
秀再清風人涕淚盪爲煙埃而君已死不復歌
舞爲太平之民然而君固達微之君子尙在人
間猶將繼山樞蒹葭之音未能忘情於當世也
光緒十有八年歲在壬辰暮春之月既望譚獻

撰

序

三

予年十五從寶應喬笙巢先生學爲賦先生手
惜陰書院賦鈔一冊授予其間作者若蔡子涵
琳湘帆壽昌楊柳門後周還之棹濂馬鶴船壽
齡姚西農必成並一時之雋而尤以金亞匏先
生和爲魁杓安帖排冪隱秀雄奇融漢魏六朝
三唐於一冶東南人士莫之或先予之知先生
始此也時赭寇方熾先生支離嶺南半菽不飽
出沒豺虎之叢獨絃哀歌不獲一奉手其後十
許年予來江寧讀書惜陰書院與劉子恭甫唐
子端甫秦子伯虞朱子子期亦以辭賦相角逐

如先生曩者與蔡馬楊周同而所作下先生遠甚一日遇先生桑根師坐上先生年垂六十意氣道上如三四十人抵掌談天下事聲飀飀如鉅霆得失利病珠貫燭照不豪髮差忒鐫呵侯卿有不稱意者涕唾之若腥腐聞者舌撝不得下先生夷如也先生出師顧予曰亞匏振奇人也褒貶卓犖足以濟一世之變而才與命妨連蹇不偶嘗從東諸侯游矣亦無真知亞匏者足以盡其所蘊世自失亞匏耳於亞匏何有哉予心識之既先生中子還仍珠復從予游予乃以

得於先生者授之仍珠亦日有聲乙酉桑根師
棄諸生未幾先生亦旅沒滬上科舉既廢辭賦
遂同芻狗劉唐諸子並爲異物講舍且易爲圖
書館矣每念先生與蔡馬楊周跌宕文史放浪
山澤已如讀循蜚合雜諸紀若減若沒罕有能
道其端委者又獨聚散存沒之故足深人遐慕
也耶今年春仍珠始以先生詩二冊附以詞及
雜文乞予校定先生詩妥帖排纂隱秀雄奇猶
之其賦也詞若雜文亦能攄其中之所得不同
於凡近獨予童齒即知先生而遲之六十年乃

得卒業是編距與先生執手時又一世矣世運
相禪陵夷谷堙先生既前卒不見桑海之變而
予頽齡窮海顧景無儔於過去千劫太平三世
皆一一躬丁之今且不知所終極讀先生是編
忽不禁其萬感之橫集也甲寅立冬前一日金
壇馮煦

敘

昔元遺山有詩到蘇黃盡之歎詩果無盡乎自三百篇而漢魏而唐而宋塗徑則既盡開國土則既盡闢生千歲後而欲自樹壁壘於古人範圍以外譬猶居今世而思求荒原於五大部洲中以別建國族夫安可得詩果有盡乎人類之識想若有限域則其所發宜有限域世法之對境若一成不變則其所受宜一成不變而不然者則文章千古其運無涯謂一切悉已函孕於古人譬言今之新藝新器可以無作寧有是處

大抵文學之事必經國家百數十年之平和發育然後所積受者厚而大家乃能出乎其間而所謂大家者必其天才之絕特其性情之篤摯其學力之深博斯無論已又必其身世所遭值有以異於羣衆甚且爲人生所莫能堪之境其振奇磊落之氣百無所寄洩而壹以迸集於此一途其身所經歷心所接構復有無量之異象以爲之資以此爲詩而詩乃千古矣唐之李杜宋之蘇黃歐西之莎士比亞夏狄爾皆其人也余嘗怪前清一代厯康熙乾隆嘉百餘歲之承平

蘊蓄深厚中更滔天大難波詭雲譎一治一亂
皆極有史之大觀宜於其間有文學界之健者
異軍特起以與一時之事功相輝映然求諸當
時之作者未敢或許也及讀金亞匏先生集而
所以移我情者乃無涯畔吾於詩所學至淺豈
敢妄有所論列吾惟覺其格律無一不軌於古
而意境氣象魄力求諸有清一代未覩其偶比
諸遠古不名一家而亦非一家之境界所能域
也嗚呼得此而清之詩史爲不寥寂也已集初
爲排印本余校讀既竟輒以意有所刪選既復

從令子仍珠假得先生手寫藁帙增錄如干首
爲今本仍珠乃付精槧以永其傳先生自序述
其友東季符之言謂其詩他日必有知者夫啟
超則何足以知先生然以李杜萬丈光燄韓公
猶有羣兒多毀之歎豈文章真價必易世而始
章也噫嘻乙卯十月新會梁啟超

金文學小傳

予既爲蔡君紫函家傳並刻其詩若干首既又刻金君亞匏秋蟬吟館詩蓋予因蔡君得交金君申以婚姻之好三人者朝夕見交相善也金君放情詩酒跌宕自喜近於狂蔡君束脩自好近於狷予碌碌無所短長不敢望兩君萬一而兩君顧不棄予蔡君甫補官而沒金君不得志亦潦倒而亡今獨余存耳後死之責予不敢忘於是又爲金君傳案君諱和字弓叔亞匏其別字也行三亦上元人增生父某早卒母教之嚴

君遂能自立以學行聞於時尤長詩古文辭操
筆立成不加點時藝才氣壯盛不拘拘一格長
篇滔滔千餘言短或寥寥三數百言終不求合
程式用是擯斥終其身好聲色狎妓縱酒一飲
輒數斗同坐不能飲者百端說之必盡醉乃已
癸丑江寧失守陷於賊衣短後衣與賊兵時轟
飲醉則雜卧酒甕側相爾汝因此頗探悉賊情
久之遂與結納謀內應諸生張繼庚者其妻從
弟也亦陷賊中與君合謀君既與賊稔出入城
闔無所問時向忠武駐兵城外遏賊鋒軍容甚

盛君子身叩營門以情告未諾遽慨然請以身質時君家猶在賊中也使人潛與繼庚約從之者頗衆既定期官兵不至再約又不至賊遂知備城閉樹竹木爲柵其黨斬關不能出爭上城殺賊賊大至殲焉君以爲質得脫君妻亦棄其女攜姪女潛出城往依外家於全椒時蔡君在丹陽糧臺糧臺委員某因蔡君求爲二子師君應聘至丹陽糧臺總辦觀察高公雅重君留逾月及之館某不能窺君所學有違言君遂辭去當陸公建瀛之總制兩江也嘗延君課其子鍾

江讀鍾江時宦粵聞君耗遣使來迎君挈眷至
廣南已而鍾江卒於官適關道某公京師來用
蔡君薦禮君爲上客幕中事一以畀之至則皆
立辦兵刑錢穀洋務不學而能江南平攜家以
歸出橐中金縱博在粵時館穀豐腴至是揮霍
殆盡復出遊希所遇予方宰鎮海迓之來趣自
定詩文橐成蘭陵女兒行一篇唐觀察景星自
滬具函來招君觀察粵人知君才時辦招商局
欲倚以集事也自是留海上者有年至乙酉秋
而沒次子還舉於鄉君及見其報捷云子三長

遺廩生妾汪出優於才而不事生產有父風次
還爲予女夫嫡張出會試挑取謄錄以知縣用
三閨通妾鍾出幼聰穎鍾教之讀甫五齡能背
誦唐人小詩一夕病忽仰首曰舉頭望明月低
頭思故鄉君訝其不祥未幾果夭君在糧臺時
一日過蔡君求友蔡君曰此間惟束某可交耳
自是與予密略如蔡君蔡君沒君爲序其詩反
覆太息於蔡君之窮慨其文之不傳於後而僅
僅有此詩今君宿草已久舍此亦無以見君矣
則君之太息不平於地下者又當何如而謂予

能已於言乎噫光緒乙未仲秋丹陽東允泰

秋蟪吟館詩鈔卷一

上元金和亞匏

然灰集

余存詩斷自戊戌凡十五年至壬子得詩
二千首有奇癸丑陷賊後倉黃伺閒僅以
身免敝衣徒跣不將一字流離奔走神智
頓衰舊時肄業所及每一傾想都如隔世
而況此自率胸臆之詞乎顧以平生結習
酒邊枕上或復記憶一二輒錄出之然皆
寥寥短章觀聽易盡其在閎裁鉅製雖偶

有還珠大抵敗鱗殘羽情事已遠歌泣俱
非欲續鳬脰祇添蛇足而已故不敢爲也
久之亦得若干首昔韓安國之言曰死灰
不能復然乎余今之寵余詩則旣然之矣
知不足當大雅抑聊自奉也因名之曰然
灰集

雜詩之一

瀚海路雖廣其爲南北岸必有地在焉人自望
而歎恒河沙雖多其爲億億萬必有數在焉人
自短於算所貴爲其難大力鮮疑憚盟以金石

心百歲如一旦縱無速化期所得亦過半世有
真勇者當不謂河漢

余舊詠始皇有句云功罪一家都是火益
焚山澤政焚書兄荷生聞之曰政非益
子孫也復作長篇解之

唐虞有五臣出身皆草莽上帝監其德迭以天
下獎益爲皋陶子嬴姓大功兩姬籙旣漸衰秦
受命如嚮用兵數百年勦力作君長六王已鯨
吞乃忽設奇想欲盡愚黔首默默聽刑賞畢收
前聖書一炬入羅網諸儒並阮之冤魄訴泉壤

禹湯文周孔怒排惡氛上翩然來帝旁乞罪意
鞅鞅謂彼無道秦流毒及吾黨帝顧益曰吁禍
實自汝昉當時烈山澤火官汝所掌子孫竊餘
燄敢作此魍魎益拜手對曰臣宗久被攘今茲
虐者政遺體是奸駟春秋典臣祀非類臣不享
帝儻降之罰請以龍族往赫赫赤帝子火雲起
芒碭

送葉生之廣西

諸葛垂大名小心僅自許唾面必拭之婁公怒
其語由來謙與謹君子擇所處生今初出門萬

里通縞紵詩書家教深少小富才諳豈至大純
繆與世甘齟齬所恐氣太盛隨事作豪舉羣兒
齟齬多揮叱本易與坐此膽愈麤一日賢者拒
相輕不相下乃以傲名汝戒雖懲覆車謀已羞
越俎徒令夔憐蚘何曾蛰負駟慎哉心貴平矜
躁萌務去但使交遊閒人人如飲醕方寸清不
淆直節豈消沮匪曰常畏人而爲廁中鼠匪曰
以柔全而爲市門女

題陽湖孫竹康

廷錄

詩稿

盡數寫六書只此數萬字中所不熟習十復閒

三四循環堆垛之文章畢能事苟可聯貫者古人肯唾棄而以遺後人使得逞妍祕操觚及今日談亦何容易乃有真壯夫於此獨攘臂萬卷讀破後一一勘同異更從古人前混沌闢新意甘使心血枯百戰不退避一家言既成試質琅嬛地必有天上語古人所未至觀君生平詩將無持此議竒想入非非奏當即老吏古人見亦驚不盡關腹笥彼抱竊疾者出聲令人睡何不指六經而曰公家器

贈楊鴻卿

子新

治病如治國政便風乃暢勿束若涇薪而挾以
冬纊庶幾恩所馴弱者神不喪解此以用藥良
醫即良相治病如治兵計決聲乃壯勿待設三
覆而急駕兩廣庶幾威所震强者志不抗解此
以用藥良醫即良將我雖不知醫此語或非妄
昔惟石麓翁每洞見腑臟鏡懸無遁情到必立
懲創次則石年子亦辨膏肓尙斟酌淺與深引
之衢尊釀操術不甚同兩人固瑜亮所惜無長
生先後神仙葬自餘齷齪者言大力弗償大抵
志衣食虛名得真浪君好古文章餘事岐扁訪

既傳家教多更負夙慧況善讀雷九名妙解蘿
蔔唱或以意爲之肯受古人誑奇想縱非非奪
命豈嫌叔自從肺附來羸體得保障頗已呼陽
春應手總無恙要非盤而錯尙未識心匠去年
婦產難子欲與母妨四日始免身半步即墟壙
其時方奇寒鑪竈不足仗禍根坐此深積血憑
氣張邪魔更乘虛咄咄怪鼓盪歧中又有歧作
病日千狀呻吟意都慵待死卧紙帳諸醫各獻
技手辣膽敢放陳陳語相因萬都無一當叩門
乞君來在三月既望徧問諸醫方大笑天屢仰

盡撥浮雲談乃覓金丹餉一投痛始蘇再投色
已王三投衣脫絲四投飯加盎如過大庭庫猛
火燒其藏如觀瓠子河大風卷其漲如登珠厓
山烈日銷其瘴前後兩旬閒披靡藥所向陽陽
平常如忽忽痼疾忘始知能者能十全都上上
於古將相才君定不多讓用此活世人陰德胡
可量我謀酬君資家貧物無長歌詩聊贈君君
樂聞焉儻

棄婦篇

威鳳不逐凰大鴛不辭鴛如何人閒世乃有棄

婦郎妾初嫁郎時妾年才十六郎眷妾如花妾
倚郎如玉郎貧妾工織郎病妾解醫郎飲妾貰
酒郎讀妾寫詩妾是草下泥郎是泥中草自爲
郎心堅不關妾貌好秋雲上郎面秋風生郎懷
郎意妾知之勸迎阿妹來妾恐郎不歡事妹如
大婦郎怒妾無禮事妹如慈母阿妹喜膏沐妾
進黃金釵阿妹倦鍼綫妾製紅羅襪阿妹善事
郎願郎勿嗔妾郎身重如金妾命薄於葉郎尋
遊京師妾與阿妹居五月使人來有迎阿妹書
聞郎捷南宮水部官已貴妾辦阿妹裝十日不

曾睡阿妹遠隨郎堂有卧病姑姑病頗憶兒妾
勞當代夫朝調姑飴錫夕煑姑湯藥姑生縫衣
裳姑死備棺槨姑死無一人姑死無一錢家信
斷已久阿妹行四年手寫姑遺言辛苦寄郎處
郎將阿妹歸逐妾出門去郎親與妾語昔是姑
在時如今姑已死留妾復何爲妾思郎舊恩願
與爨婢齒郎知妾無家欲妾爲勾死回頭哭向
郎阿妹與妾殊阿妹似欲哭莫亦疑郎無

花朝孫竹厓全椒吳次山

西廡

招飲青溪

酒樓大醉明日呈二君兼調含山慶子

元光亭

百無一勝人與酒作生活長貧吟亦嬾乘醉或
塗抹昨日歸閉門巾服已先脫壺酒雖日設局
促在閨闥忽飛片紙來卒讀胸宇豁向婦喜欲
顛去如箭辭括酒旗遙招人入坐燭未跋一升
纔解饒三升愈流沫五升浣俗塵勢乃不可遏
腸輪與眉鎖一一化轆轤四旁初無人狂語任
欺潑湏臾月漸上暮雲墨暫撥靈娥色最媚愛
極不忍喝獨恨天太寒冰雪虐勝魃緋杏歛笑
拊黛柳尙髡枿春風御者誰呼之合鞭撻安得

羯鼓催唐皇妙旋斡此時飲尤豪銀漢巨鯨鯨
興盡方還家倒提竹燈筭天忽作急雨菜圃泥
滑漣行人頗倉皇我頓呼咄咄今日花生辰芳
信定上達或者江以南東帝舍偶芟列僊辦供
帳琪果隨意拈苦酒頗不醅新釀等粗糲既進
上壽觴帝意病其辣香案怒一推下界流濺濺
輕雷故驅馳略助帝呵旦諸君試嗅之撲鼻尙
餘馥儻許乞涓滴我欲拾而掇諸君知我醉窘
步扶蹙蹙入室紛喧嘩纔知反著襪老母促我
睡默默婦蹙頰本來米汁禪有此醉菩薩不知

何人言逆耳強相聒謂酒能戕生代女心震怛
伐腦餘黃膠潤吻無紫葛他時悔則晚何如愛
早割我道窮愁中萬事付茅茷鳳癡嚇避鵩虬
困誚任獺放眼緇塵迷齒冷不勝齧惟與麴生
交此慶同釋褐吾師劉伯倫墮地受衣鉢區區
歡伯歡胡然更抹搯勞薪擔方重酒詎能天闕
況吾生百年駒隙竊芻秣有如是且病中歲患
消渴有如病且老晚飯不盈撮有如老且死黃
泉悲道暍雖復酒如澠何關一毫末及此來日
長敢不自振拔諸君如達觀酒泉勿壅竭寄聲

大戶人量常海樣闊不信溫柔鄉輕把醉鄉奪

子元自納姬後屢辭客
飲是夕招之又不至

正月二十九日作

去年冬不寒朔雪匙飛絮斗水值三錢青溪盡
泥淤老農防旱荒方抱無麥慮誰知元日來雨
師忽叱馭愁霖兼三旬紅日不掌曙有時雜雹
珠虐更北風助敝裘都失溫酒壚苦蹲踞弱柳
欲吐金縷縷挂冰筋菜畦撥凍泥韭芽未可茹
鶯澀偶一哢衣薄詎敢翫江南好風月不知在
何處奏章問東皇底事耐冷署天上儻春多於

言一
意更不怨韶光雖九十一月太恩遽頗似我生
平少壯愁中去

題兄荷生雜詩

先生姑妄言之耳如古所云則謬矣六合以外
千秋前安在奇聞不如此賢姦萬輩冤獄多一
二大略在青史鑠金糞玉岐中岐誰能曲折寫
諸紙苟有得於當日情欲決黃泉問枯鬼至於
淫沴氣所鍾百怪甘人角而齒禹鼎一一雖鑄
之腥穢肝腸恐未死其閒亦各能語言但我不
及解而已悲來忽作荒唐詞哭向蒼天眼無水

欲將此意振聾聵先生听然笑曰止

蘆花衣

有蘆有蘆在江之濱有蘆有蘆在兒之身蘆花
蘆花兮衣未寒母賜兒衣母恩如山儻是蘆花
衣也無兒行履霜骨已枯

瀨水金

瀨水寒上有麥飯一簞瀨水深中有千兩黃金
金兮金兮投女瀨水贈奇女子女子生平最知
已路上相逢爲我死投金敢謂報前恩謂我如
今果活耳

紫荊樹

兄弟散紫荊爛兄弟合紫荊活紫荊紫荊兮有
神意竟與人家兄弟事春風徧地紫荊花榮枯
爭不似他家

十疋絹

一疋絹臣所愛十疋絹臣所愧絹兮絹兮顏色
好十疋賜臣何太少臣受絹歸臣罪深堂前有
客至十萬斤黃金

丹陽舟

朝遊丹陽江丹陽之江使人愁暮遊丹陽江丹

陽之江使人憂一旦忽逢載麥舟舟兮舟兮今
贈客矣舟麥有時盡客貧方未已客再貧時非
范公兒慷慨者誰

燈籠錦

芙蓉錦太綠海棠錦太紅不如織錦成燈籠錦
兮錦兮來路遠送與深宮舞春晚如今入宮拜
昭儀不是村裏同居時故人新貴矣那容錯投
贈綈紵雖輕相公罪證

落花歎

花魂逐風行香去紅猶在吹落綠池塘盡力作

恣態誰家別隲有花開今日夕陽人不來

送春詞

鄰家姊妹留春住兒家日日催春去起來酹酒
楊花中暗彈珠淚隨東風但憑一路鶉聲裏送
春直過黃河水替兒夫壻脫寒衣明年莫在人
前歸

題績溪方石湖

鍾

按劍圖

丈夫按劍未一言怒已有聲到牙齒世無血性
雌男兒搶地自知罪當死回頭大笑不屑殺若
輩人閒雞犬耳佞臣舌與貪臣頭乃欲上書奏

天子時乎未來且飲酒君少而狂氣如此只
今白髮漸星星早已中年雜悲喜鄉里庸奴俳
謔之誰信酣歌舊燕市摩挲此劍復何用鐵鏽
成花鋒鈍矣我生雖後君十年綺歲才名去如
水棄書敢說俠腸熱紅塵誰爲刺窮鬼見君此
圖欲一鳴如今吳越兵方起封侯骨相儻無種
更與君摩滄海壘

已亥之冬君嘗假職守舟
山百日今海疆又不靖矣

詠史三首

張儀始見蘇君時堂下草具不敢辭儀無能爲
亦可知如何入秦自縱之詭哉詭哉此張到感

恩請用不言報蘇君既死儀尙生前日之短一時暴世無王者姑合從於六國時差有功橫人實滅六國耳傾險誰謂儀秦同蘇君惡聲靡不有我道蘇君乃自取當年何不拔其舌詐者猶能相秦否

王孫鍾室曰寃哉陳豨私語何從來當時架空造此獄鄼侯呂后實禍胎沛公臘已高野雞終篡漢故知絳灌易與耳留侯曲逆尤黨亂孤忠獨有此少年必誅產祿首爲難功臣各就封第一蕭先曹國士無雙由我薦今獨王楚功尤高

雲夢之禽未快意所忌不殺非云蒙內外畏其
才淮陰不活矣歌風更有將將者聞之且憐亦
且喜藉告天下士莫恨無知已有知己所以死
癡人乃說商山碑謂是惠帝書賜之至竟四皓
其人誰曰無其人亦武斷曰有其人胡事漢大
抵有其人來者則非真留侯僞飾四老者教以
言語欺其君高祖本無廢盈意見此衣冠尤短
氣殿前指示戚夫人聊塞夜來酒邊淚如意既
不立四老歸釣屠呂雉感其恩厚賜無時無否
則殺之以滅口陳平陰禍亦有餘

陳忠愍公死事詩

公諱化成福建人官江南提督壬寅五月英人

入吳淞江公死之

千聲萬聲敵火急火光照海海水赤將軍一人
當火立衆人爭請將軍行將軍竟行誰守城棄
城而去何顏生此時欲戰兵已潰敵則能進不
能退除死以外更無計一火忽中將軍肩崇臺
百尺灰飛煙英魂烈魄上九天將軍雖死抱餘
恥殺敵方能報天子臣功在生不在死今以
一死蒙恩深褒忠猶自煩綸音是臣之
節非臣心

圍城紀事六詠壬寅英夷犯江之役也

守陴

將軍

德珠布

突遣追風騎九城之門一時閉

江甯凡十

三城門其四久閉

道有訛言江上傳今夜三更夷大至

此時行者猶未知須臾聞說皆驚疑入城出城
兩不得道旁頗有露宿兒平明馳箭許暫開沸
如蠅集轟如雷土囊萬箇左右堆羊腸小徑通
車纔老翁腰閒被劫財脚下蹴死幾幼孩村婦
往往踣墮胎柳棺摧拉遺尸骸摩肩擁背步方
跛關吏一呼門又鎖繞郭聲聲痛哭歸頭上時

飛洗礮火

事始於六月八日
時夷尙未陷鎮江

避城

海上逃人言鑿鑿夷於丁男不甚虐惟與婦人
作劇惡比戶由來皆大索城中兒女齊悲號四
鄉一一謀枝棲尋常家具邀人齎腰纏浪擲輕
如泥誰謂鄉農亦稱霸百金纔許蝸廬借瓢水
束薪珠玉價釵鈿裙襪奪之詐稍不如意便怒
罵搶地無言但拜謝道來此閒已被赦不見鄰
婦頭髮無錢能賃香笥籃膝前有女年十三
中夜急嫁西家男身攜布被居茅庵

募兵

城中舊兵不如額分守城頭尙無策何論城下
詰暴客市兒反側頗接迹一旦招之入軍籍朝
來首裹青布幘細襻革鞞盈尺黑衣蔽腹袖
尤窄堂下羣鴉立無隙或舞大刀或礮石取其
壯健汰老瘠九城纍纍保衛冊時分城內爲九道晝坐
當門怒眼赤大聲能作老梟嚇惡勾往往暗禡
魄夜出走巡街巷柵火光燭天月不白木挺竹
鞭在肘腋時鄉兵不登城兵器皆以竹木爲之取足衛身而已吠犬無聲
都辟易一人日與錢一百勤則有犒惰則革借

問誰司鼓與鉦居然高坐來談兵百夫長是迂

書生

主其事者大都吾輩而已

警奸

西北諸山火星墮都說城中有夷夥中夜能爲夷放火大吏責成縣令拿縣令責成里長查何

人野宿蹲如蛙搜身偏落鐵藥沙

時首獲郭犯身有鉛藥數

丸或曰郭固官頂匠藥其所宜有也

邏者見之喜且譁侵晨縛送

縣令衙縣令大怒棒亂搥根追欲泛河源槎叩頭妄指讐人家一時冤獄延蔓瓜從此里巷紛如麻人人切齒瞋朝鴉平日但有微疵瑕比來

盡作虺與蛇往往當路橫要遮道旁三老私歎
嗟平原獨無董事時司九城保衛者皆謂之董事昨日亦獲
瘦男子大抵竊雞者賊是

盟夷

城頭野風吹白旗十丈大書中堂伊

前協辦大學士伊里

布在浙江時爲夷所感服故以此緩夷

天潢宮保

太子少保宗室耆英

飛馬

至奉旨金陵句當事總督太牢

牛鑑

瘖不鳴吳淞

車償原餘生九拜夷舟十不恥黃侯

署江甯布政使黃恩

形自分已身死十萬居民空獻芹香花迎謁諸

將軍將軍掩淚默無語周自請盟鄭不許聲言

架礮鍾山巔嚴城傾刻灰飛煙不則盡決後湖

水灌入青溪六十里皆當日奏章中語也最後許以七馬

頭粵閩江浙許夷交市者凡七所浙江更有羈縻州浙江定海縣許夷僑

寓一白金二千一百萬三年分償先削券券書

首請 帝璽丹大臣同署全權官盟書首帝寶次其國王

印次諸大臣押次其酋長押其酋長署銜曰全權公使冒死入奏得 帝

命江水汪汪和議定

說鬼

三大臣盟江上回侍從親見西鬼來江南俗稱夷曰鬼子

白者寒瘦如蛤灰黑者醜惡如栗煤髮卷批耳

髭繞腮羊睛睒睒秋深苔言語不通惟笑咍高
冠編篋笠異臺氎衣稱身無翦裁漆鞵綠滑琉
璃杯短刀雪色銀皚皚袖中礮火花銅胎鏡簫
五尺窺八垓寸管作字鏤纖埃口銜菰葉紅不
食長壺斟酒鵝黃醅聽者不覺心顏開有塔高
矗南山隈鬼官日日遊相陪父老奔走攜童孩
隨行飽瞰歡若雷居然人鬼無疑猜亦有賤駟
真奴才何樓僞貨欺癡獸竟買小舟樹短桅船
輪要看火燄推晚歸向客誇多財雙鳳彎環錢

百

更市物所用洋錢背多鑄雙
鳳與向來流入中國者異

雪後與慶子元吳次山飲村店放歌

萬人冷眼看塵寰
天空地闊無援攀
報恩閒殺珠與環
愁城有劍憑誰刪
昨夜瀛海諸仙班
戲翦雪花散帝關
雨師風伯緣爲姦
乃以人命相草菅
奇寒中人百體輟
九天不計窮民瘼
令我瑟縮靡居圜
惟酒可作贖罪鍰
夕陽紅上城南山
鴉聲一一從東還
酒旗遙在黃蘆灣
茅龍小店遠市闌
到來休問囊錢慳
三斗入腹披狐豻
酒亦奇才非等閒
竹中調笑黃梅斑
舉頭瞋見新月彎
停車歌乏傾城鬟
此時豈畏羣兒訕
但

恐一醉髮已頒生來駿足難韁閑死便埋我青山間千秋化石應不頑我語雖狂非厚顏

苜蓿頭

苜蓿頭斜陽低苜蓿頭腹中飢我呼苜蓿來其人面目如黑煤身有敝襦脚無鞵是男是女相疑猜試問何太苦不覺淚如雨自言今年已十五去年喪父兼喪母千錢賣作童養婦阿姑畜之如畜狗秋天日斫柴一航冬天日拾糞一筐春來苜蓿可作菜掘之使到城中賣每日須賣二百錢歸家許食菜菔饅錢多不加一勺饅但

缺一錢與一鞭此菜一斤四錢耳賣五十斤方
稱是力小還須去復來出城入城二十里昨日
缺錢晚未食今日强行更無力菜葉行已枯一
錢仍未得我呼家人急賜飯叩首當階呼不願
願人盡買菜青青但不受鞭餓何怨餓何怨鞭
不支且進飯休涕洟汝言未終我心碎復與百
錢喟而退吁嗟乎童養婦前生雙童養婦終年
囚童養婦水中泅童養婦火中投君不見苜蓿
頭君不聞苜蓿頭

祀青溪小姑神絃詞

玉簫聲軟春雲流青天尺五香煙浮綵旗忽下
黃粟留靈之來兮落花急苔徑無塵酒痕溼水
邊樓閣宜垂楊兒家夫壻多離鄉小姑莫更愁
無郎迎神

絲風欲閃銀燭光茶煙斷處斜陽黃赤闌干下
練衣涼靈之去兮畫船動春魚不躍浮萍重杜
鵑唬徹無人行青山將候姑阿兄何妨暫住過
清明送神

十一月十五夜作

昨夜有酒月未圓今夜月圓無酒錢平生敢說

酒星小月夜不飲非神仙豈但不飲非神仙夢
魂定落愁城邊愁城一落不得出荷鋤真欲埋
黃泉東家老父新釀熟當時許我壚頭眠往從
貫之得三斗大笑自拍狂奴肩衝寒獨上西山
巔此時下界無人煙酒杯在手月在天嫦娥中
年我少年

入暮

入暮寒逾甚歸來掩敝廬濃斟女媧酒周氏婦饋酒一
斗細檢父談書時方校先君子遺藁霜重渚鴻咽風嚴城
漏疏一燈兄弟坐炙硯小爐初

客有書來訊余近況者作此答之

來日方多事窮途豈死時平生不爲舌居世本
如眉未賣書千卷常賒酒一卮愁中有佳趣報
女此新詩

題慶子元白門訪舊圖

子元家含山自其少時久客金陵壬寅六月夷人犯江子元先期歸既盟夷子元復來金陵因繪有此圖甲辰秋余始交子元出以屬題

作客江南好看花春復秋鬼兵能破膽鄉夢與
回頭容易烽煙靜懷人起舊愁元龍湖海士天
外又扁舟

如此江山在曾經蹂躪過只今佳麗地疑有惡
塵多誰掬天河水夸娥與洗磨登高撫長劍來
日定狂歌

十萬臨淄戶重來數暮煙縱無零落感總不似
從前幾輩沙中燕誰家雨後鵲況堪楊柳樹顛
顛板橋邊

休問當年事城居記被圍驚魂曾跼跼交睫尙
依依爲爾檝重擊教余戈欲揮樽前且呼酒羞
說淚沾衣

得慶子元書並惠酒資

君從千里外忽寄酒錢來爲是天寒甚教余笑
口開去看霜徑菊今折隴頭梅三月相思意都
歸此一杯

歲除日慶子元自泰興來已泊江上復歸
含山馳急足來報答此代柬

望君如望歲明日是明年江上飛書至知君已
泊船忽聞中婦病重整故山鞭春酒遲君醉來
看燈月圓

郊行見孤鴈感賦

薄暮方沽酒冬山淡夕陽風聲千樹葉雲意一

天霜孤鴈宿何處江南路正長竟如人影瘦零
落不成行

時先兄荷生
去世七月矣

揚州客邸作

不慣揚州住蕪城數暮鴉世情原魯酒人意亦
唐花客路江難縮秋林日易斜雲邊親舍近吾
夢欲還家

秋夜

藤牀初睡起銀漢已低垂深竹潤如此野花香
爲誰微雲來往處明月有無時夜夜人歸後秋
涼一蟀知

燈草三十二韻

靡徑重搜草蘭成更賦燈吐芬依楚澤絨秀遶
秦塍拂髮當風亂虬髯拂水澄秋航蓑與織夏
館簟宜登有客循華渚隨時刈宿芳莎邊塞綽
約蒲外束鬚髻剝倩纖纖筍抽疑裊裊藤膜肥
金褪屑心絜玉交繩弱綫誰搓絮長條此撚冰
絲蓬鬆試絳弦脛猛休捫并翦鉸纔便蠻箋裏
略勝辦香珍聘似下策火攻能院宇初昏後樓
臺最上層銅盤呼婢挂漆几把書凭莖短濃教
漬膏深膩欲凝鴨爐紅燼逗雁檠素輝騰瘳縷

還嫌暗雙枝或待增挖珠調鼠覷挑粟惹蛾憎
穗定寒頻斂花攢喜漫憑影惟從月淡色早學
雲蒸遠志中常熱春暉寸敢矜龍耕煙自煖螢
化燄何稱得傍明星爛奚煩纈眼懲削松辭浣
女斷帶笑吟朋照夜光誠大餘芳事別徵楓按
和雪落茵煮借霜凌眠硯柔欺錦摩賤滑勝繒
善防囊走麝替洗字譌蠅灰問新晴信湯消內
熱癥兜鞵輕到底欹枕輒無棱虎魄黏猶可雞
毛換未應纏來蘆管細分映燭奴曾

春星

東皇夜夜促鸞輶珠采金芒宿衛圓欲與月爭
歡喜地尙無河阻別離天照花心事如紅燭種
樹時光有綠錢斗轉參橫頻指點嫁人風景又
新年

雨後泛青溪

青溪雨過溼濛濛畫舫輕移似碧空芳草生時
江水綠春山明處夕陽紅橋邊帘影低迎月樓
上簫聲暗墮風最是亂鶯曉歇後卷簾人在柳
花中

送慶子元之泰興

言一
爲是窮愁意倍親青袍落魄對黃塵酒杯以外
原無物詩本如今漸等身舉世茫茫常遇鬼出
門惘惘又依人斜陽莫灑臨歧淚明日蘆花最
愴神

初遊樸園

十分春色在柴扉眞悔紅塵插腳非一片鳥聲
供勸酒四邊花氣替熏衣略添醜石山逾秀纔
著疏萍水便肥不是主人能好客夜深也待月
明歸

月夜訪孫竹廬

漸入空山近戴家四圍煙樹定昏鴉流雲有意
欺明月芳草多情護落花茅店風知新酒熟柳
塘水送去燈斜此閒樓閣如天上何必桃園問
釣槎

遊妙相庵

四邊山色一園新忘卻門前有熱塵春盡草香
濃似酒日長花意倦於人短橋水上萍爭路小
閣雲多竹買鄰不受提壺村鳥勸爲留醒眼拜

靈均

庵有屈
子祠堂

傷逝

時秦雪舫方石廉顧秋碧
程野樵諸君先後并卒

爲問天邊幾玉樓教人一死誤千秋休傳白鶴
生還語已作黃河東去流如葉自憐三尺命有
花難解十分愁著書明日無憑事何待潘生歎
白頭

樸園有老樹不名方秋作花甚冷而豔詩
以慰之

一例花枝玉樣齊竟無春夢許君迷柳雖輕薄
鶯猶占桐易飄零鳳卻棲但使爭香塵裏過何
曾分蔭日邊低浮生豈獨甘埋沒聲價憑誰爲
品題

如姬

侯嬴甘一劍以死報公子魏王失軍符美人生
與死

雜詩之一

千金買駑駘一顧失追風追風亦有罪甘雜駑
駢中

初夏六詠和兄荷生

掃花

掃花裝枕頭魂夢共清絕不爲落花香爲見開
時節

創筍

攜鋤向竹林不知筍何處一枝露頭角便有人
鋤去

贈扇

蒲葵自南來故人新贈與拜賜及此時秋天誰
用汝

垂簾

紅日有驕態竹簾清若水始信綠棠陰庇人亦
如此

飼蠶

采桑飼紅蠶吐出絲千道不是蠶吐成誰知桑
葉好

放鴨

柳花作萍時放鴨向春水望爾羽毛成至今飛
不起

飼蠶詞五首

春寒箔上蠶猶嬌箔下炭灰終夜燒貧家亦有
跳梁鼠從人乞得銀花貓

曉來要看蠶稀稠又恐蠶將嬾婦羞蠶會吐絲
學蓬髮朝朝燈下起梳頭

早去買桑桑市東歸來摘葉蠶房中旁人不解
惜桑葉奪取一枝桑甚紅

阿娘辛苦養蠶天嬌女陪娘瞋不眠含笑許縫
新韞袴待娘五月賣絲錢

西家小妹來堂前也知愛我蠶絲鮮翦將素紙
乞蠶吐要作菱花鏡套圓

紫雲曲六首仿曹堯賓體

問徧青天少酒家夜深難覓海人槎無聊盡斫
吳剛桂自汲銀河水煮茶

玉斧樵回一事無夕陽紅過小方壺門前笑倚

三珠樹閒拾飛花飼鳳雛

五雲深處鎖天台幾樹桃花落更開昨夜劉晨
尋路到春風吹下笑聲來

梧桐樓閣掩金扉十萬收香噪落暉一片紅雲
天女過齊州烟裏散花歸

龍田瑤草十分香處處丹爐火色黃擺脫紅塵
眾仙子朝朝贏得點金忙

蔡家今日宴羣真有約麻姑餞尾春青使頻邀
還未到瀛州山頂射麒麟

新種柳

生小爭春眼媚初露黃煙綠不嫌疎淩波自寫
當風影爲是旁人畫不如

孫竹康之常州吳次山之揚州以同日行
時慶子元滯泰興未歸

望斷海東人不至諸君明日更飄萍江南春盡
落花急賸我零丁一酒星

送春日寄吳次山揚州

無沽酒處猶餘冷盡落花時更不愁聞說春歸
到江北那禁惆悵望揚州

舟發石頭城夜作

涼雲斷處遠天青
兩岸菰蒲萬斛螢
飲慣石頭城下水
如今著我作飄萍

題慶子元畫

絕瘦孤花稱晚涼
著些秋雨也無妨
倡條冶葉從人采
自辦空山落後香

雨蘭

埋香歸去意沈沈
自寫春愁付綠陰
墮溷飄茵何太巧
東風未必盡無心

落花

西施詠

溪水溪花一樣春
東施偏讓入宮人
自家未必無顏色
錯絕當年是效顰

野寺見桃花題壁

纔有花枝帶露開等閒蜂蝶便飛來紅塵誰報
香消息多恐春風是自媒

嘲燕

海燕將雛分外忙呢喃終日向華堂生兒盡學
江南語秋後如何返故鄉

春閨曲

也卷重簾也倚闌暗緘柳絮寄人看東風用盡
開花力吹上儂衣只是寒

秋閨曲

秋來怕說寄衣裳自盼音書暗斷腸昨夜雨中
鴻雁過今年人是不還鄉

春秋宮詞六首

寫盡房中敝笥詩外臣消息報無知深宮尙拜
秋瓜賜斷絕君恩是此時

火急軍書駭外臣一時宮婢更含顰從今防著
桃花醋不是當年不語人

狄語鉤輅到耳邊第三宮裏晚開筵含情笑指
庭前木未到人間廿五年

陰里紅絲出洛陽諸姜誰著后衣裳內家弟妹

都調笑爲問王髭幾許長

綠衣爭受瞽奴鞭花下君來泣不前含怒回他
身上痛去彈琴處覓人眠

故國田歸妾入齊舞筵夜夜醉如泥金盤忽進
魴魚鱠君寵君憐總欲唬

十六夜見月

雨漫秋河半月餘今宵纔見玉蟾蜍可知鏡裏
人應老不是長眉乍畫初

書恨

蓮荒豈少魚藏葉葦敗猶餘雁折枝絕代芙蓉

根盡死可憐紅是不多時

秋蟬吟館詩鈔卷一終